

Այսպէս, ուրեմն, փաստերը ցոյց են տալիս, որ հանդիստը և խաղաղութիւնը խանգարող հանդիսանում են ոչ թէ մասմետականները, այլ հայերը, որի պատճառով մենք, այսինքն՝ Կովկասեան Իսլամական կառավարութիւնը, չենք կարող կատարելապէս հաւատալ հայերին:

Զէնքերը յանձնող հայերը կը լինեն մեր թանգազին հպատակները, որոնց պատիւը, կեանքն ու գոյքը կը գտնուեն մեր հովանաւորութեան տակ. նրանց վերաբերմամբ ամենափոքրիկ ցոյցն իսկ չի թոյլատրւի: Զէնքեր չյանձնող հայ գիւղերը կը համարուեն կառավարութեան թշնամի և նրանց դէմ ձեռք կառնուեն խիստ միջոցներ»:

Շնորհիւ իրենց ճկուն բնաւորութեան, գողթնեցիք կարողացան զլուխ պահել «Իսլամական կառավարութեան» իշխանութեան տակ:

1919թ. մայիսին, Նախիջևանի գրաւումից յետոյ, Գողթնը դարձաւ նրա երեք գաւառներից մէկը՝ Ագուլիս կենտրոնով: Ընդհանահանգապետ Գ. Վարչամեանը Գողթնի դաւառասպետ նշանակեց Աշոտ Մելիք-Մուսեանին, իսկ միլիցիայպետ՝ երիտասարդ ու քաջ սպայ Մովսէս Գիւլնաղարեանին: Սրանք նոր էին հասել իրենց պաշտօնավայրը, երբ տեղի ունեցաւ մահմետական ապստամբութիւնը Նախիջևանում, և Գողթնը նորից կտրեց Հայաստանից:

Օգոստ. 3-ին, Ա. Մելիք-Մուսեանն ու Մ. Գիւլնաղարեանը, Վերին Ագուլիսից, «Հայաստանի Խորհրդարանին, Հայաստանի կառավարութեան, Գորիսի, Ղափանի, Գենուազի պետական ներկայացուցիչներին, Աղզային Խորհուրդներին և ի լուր համայն հայութեան արին հետևեալ դիմումը.

«Նախիջևանն ընկաւ. շրջանի հայութեան բաւական խոշոր մասը սրի է քաշած Արաքսի մէջ նկատուած են մեծ թւով դիակներ: Նախիջևանի մեր գօրքերը, ըստ թուրքական լուրերի, կոտորածից ազատուած հայութեան մնացորդների հետ նահանջել են դէպի Դարալագեազ: Նոյն աղբիւրներից իմանում ենք, որ Նեհրամում հազարից աւելի հայ գերեալներ կան: Զուրֆայում ու Զուղայում խոշոր դէպքեր տեղի չեն ունեցել — ժողովրդի մեծագոյն մասը և մեր փոքրաթիւ գօրքը անցել են Պարսկաստան: Ազա և Դեր գիւղերը անվնաս գաղթեցին Յդնա: Երնջակի ձորում, ականատեսների պատմելով, տեղի են ունեցել սոսկալի կոտորածներ: Ղաղանչիից ազատել և Գողթն են ապաւինել մօտ 500 հոգի: Մի օր տեղի կռիւներից յետոյ Գեազը, Փորաղաշտը և Շուռութը շատ քիչ զոհեր տալով՝ քաշուել են Գողթն:

Յուլ. 25-ից Գողթնում ուժեղ կռիւներ են տեղի ունեցել: Վերին գիւղերում (Փառակա—Բիստ) յաջողութիւններն առ այժմ մերոնց կողմն են: Տանակերտը 8 օր է պաշարման վիճակի մէջ է. այստեղ տեղի են ունենում դիրքային անընդհատ կռիւներ: Պաշարուած կարելի է համարել Վերին և Ներքին Ագուլիսները: Թուրքերը խոշոր պատրաստութիւններ են տեսնում մաքրելու Գողթնը հայութիւնից: Ժողովուրդը աննկարագրելի նեղութեան մէջ է հացի կողմից: Արտաքին աշխարհից կտրուած ենք բառի ամենայայն իմաստով: Մի քանի անգամներ սուրհանդակներ ենք ուղարկել Գենուազ օգնութիւն և լուր ստանալու համար, բայց մինչև օրս չեն վերադարձել: Գողթնը լքած իր հարադատներից և կտրուած արտաքին աշխարհից, իր անելիքների մասին ճիշտ հաշիւ տալ իրեն չի կարող: Ապաւինել թուրքերի ողորմածութեանը՝ ներկայ հանգամանքներում անհնարին է: Ի սէր Աստուծոյ, ցոյց տւէք մեզ փրկութեան ճանապարհ: Սեփական միջոցներով ամենաշատը